



Caderno da crítica

Cuestionario Proust: Carlos Negro

[Ramón Nicolás](#) 25 Abril 2014

1.– Principal trazo do seu carácter?

– Ás veces, o escepticismo; outras, o entusiasmo.

2.– Que calidade aprecia máis nas persoas?

– A intelixencia, a xenerosidade, o sentido do humor.

3.– Que agarda das súas amizades?

– Que compartan unha conversa tranquila arredor dun café.

4.– A súa principal eiva?

– A indecisión e certa tendencia a fecharme en min mesmo, sen querer saber de ninguén.

5.– A súa ocupación favorita?

– Ler, escribir, pasmar.

6.– O seu ideal de felicidade?

– Sentar nunha hamaca á sombra dun carballo e ler un conto de fantasmas.

7.– Cal sería a súa maior desgraza?

– A de calquera persoa con fill@s: perdelos, velos sufrir ou morrer.

8.– Que lle gustaría ser?

– Un bo mestre para o meu alumnado; e, se cadra, un poeta que deixe algún verso que resista o paso do tempo.

9.– En que país desexaría vivir?

– No país de *Nunca Máis* e non neste de *Éche o que hai*.

10.– A súa cor favorita?

– O negro, por estética; o lila, por principios.

11. – A flor que máis lle gusta?

– Na casa, a orquídea; no monte, a das xestas.

12.– O paxaro que prefire?

– Por motivos literarios, o corvo; pero tamén a pega rabilonga e o paporrubio.

13.– A súa devoción na prosa?

– De Stephen King a Álvaro Cunqueiro hai todo un universo de posibilidades por percorrer; en xeral, toda a literatura fantástica e de terror.

14.– E na poesía?

– Rosalía de Castro, Manuel Antonio, Álvaro Cunqueiro, Anne Sexton, Raymond Carver, Olga Novo... e así ata o infinito.

15.– Un libro?

– Hai tantos! Na infancia, *As aventuras de Huckleberry Finn*, de Mark Twain; xa de adulto, *Mirall trencat (Espello roto)*, de Mercè Rodoreda.

16.– Un heroe de ficción?

– Conan o Cimmerio, sobre todo na etapa que o debuxaba Barry Windsor-Smith; tamén me cae

simpático Spiderman.

17.– Unha heroína?

– Na infancia, Heidi; na adolescencia, Red Sonja. Agora mesmo, todas as mulleres dos poemas de Rosalía de Castro.

18.– A súa música favorita?

– Sempre fun moito de Bruce Springsteen e de Freddie Mercury; agora mesmo, por exemplo, Sés.

19.– Na pintura?

– Laxeiro, Caspar David Friedrich, Edward Hopper, Álvaro Negro...

20.– Un heroe ou heroína na vida real?

– Todas as persoas que pasan as noites nos hospitais, coidando dos seus ou dos alleos.

21.– O seu nome favorito?

– Os nomes fanos as persoas que os levan. Os favoritos son aqueles que me fan pensar en xente que me dá confianza no futuro e alegría de vivir.

22.– Que hábito alleo non soporta?

– O ruído a todas horas e en todas partes; a mala educación, en xeral.

23.– O que máis odia?

– O fanatismo ideolóxico e relixioso; tamén o machismo e a prepotencia.

24.– A figura histórica que máis despreza?

– Calquera que abuse do poder mediante a violencia, a mentira e a crueldade. Por desgraza, hai onde escoller.

25.– Un feito militar que admire?

– A deserción.

26.– Que don natural lle gustaría ter?

– O do ritmo no baile e o do oído na música.

27. – De que maneira lle gustaría morrer?

– Durmido na cama, soñando cun día de verán da infancia, quizais na praia de A Lanzada.

28.– Cal é o seu estado de ánimo máis habitual?

– Dubitativo, pero tamén ilusionado coas pequenas cousas de cada día.

29.– Que defectos lle inspiran máis indulxencia?

– Os que se derivan de procesos de aprendizaxe ou de despistes sen mala intención.

30.– Un lema na súa vida?

– Como principio universal, Liberdade, igualdade e fraternidade. A un nivel máis íntimo, vive e deixa vivir.